



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 3

Yangia anidakangma :



Tir Yimym



tiryimym@aolima




tir yimym

TAPAK 7

Narendra Modi Varanasi nung nomination file süogo

Russia Tir Vladimir Putin-i tan hopta China semdangtsü



VOL. XXI ISSUE NO. 212 (ADOK 212) DIMAPUR RASEMNÜ (WEDNESDAY) MONUPII (MAY) 15, 2024 ₹ 5.00

ENPO-i ULB elections nung shilem magitsü PM Modi ket nung gari, ki aser kimung kecha mali

Dimapur, May 14, 2024 (TYO): Eastern Nagaland People's Organisation (ENPO)-i June 26, 2024 nü Urban Local Bodies (ULB) elections nung shilem magitsü nenshia metetdaksüogo.

May 14, 2024 nü Tourist Lodge, Dimapur nung ENPO sanen luden züngsemtem aser ENPO kübok kin hoho ajak külem senden ka amendang iba lemtet akangshitepogo.

Taküm February 23 nü Chenmoho yimtsing nung Chenmoho Resolution nung lateta aliba ama ENPO-i ULB elections nung shilem magitsü ta tanü parnoki nenshia metetdaksü.

"February 23 bangzüng nung ajemdaker Frontier Nagaland Territory (FNT) metongtet tashi aser iba atema tatembang lemtet ka magi tashi election kecha nunga shilem magitsü" ta ENPO President Tsapikiu Sangtam-i osangbener dang ashi.

Iba ya election mokdangba masü saka shilem magiba lir. ENPO-i Election Commission dangi election nung shilem magiba atema shidi ka zülutsü,

ta Tsapikiu Sangtam-isa ashi. "Dimapur nung aliba Eastern Nagaland nung asoshi tetuyuba kecha malio. Ajisiüaka, parnoki Eastern Nagaland nungeri noktakba onük pusemba election nung shilem magitsü mulungtetra ENPO-i iba nung ashishitep kecha mali" ta paisa ashi.

ENPO bangzüngtem ya Eastern Nagaland district 6 telongtet atema dang lir anungji tanga distict nung alirtem nem tetuyuba agütsüsübaji tim masü ta ENPO President-isa shisem.

Onoki maneni Chenmoho Resolution nung noktaksü aser Frontier Nagaland Territory (FNT) takhangba ama meinyakra, lungkak aittsü mesüra election kecha nunga shilem magitsü, ta paisa nenshia metetdaksü.

"FNT atema Centre-ibo parnok teinyaksü inyakogo ajisiüaka state sorkari parnok shilem inyaksüla. Centre-i nangzüka ajak inyakogo aser lemtettem agiogo. Joko tang state sorkari inyaksü dang anünga lir" ta Tsapikiu Sangtam-i ashi.

DAYO-i NCD nem tenügang agütsür

Dimapur, May 14, 2024 (TYO): Dimapur nung tax talitabong saruba ajanga kechisarene ajak nung jenjang atuba anema Naga Council Dimapur (NCD)-i mapa tajung inyakba asoshi tenügang agütsür aser meranga inyaksü ayongzüker ta Dimapur Ao Youth Organisation (DAYO)-i metetdaksüogo.

NCD kübok Dimapur nung kin ajak dena lir aser union balala den Naga Political Groups aikati tashiyim agi sen meshiba aser tax saruba anema inyaksüla. Dimapur nung shishilembabaren atema teinyaksü mapatem meinyakra asen kidanger Assam nung aliba jilatem ang ajangzüksü, ta DAYO-i ashi.

Nagaland sorkari tashiyim agi sen sarurtem NSA kübok ken o benoktsü ta tasütait lemtet agiba den DAYO külemi noktaker. Shishilembartem tasü itdaksütsü atema police mapa lemzüksüba aser CCTVs amshitsü lemtetba ya mapang shitak nung lemtet

shitak agiba lir, ta DAYO-isa ashi. Dimapur nung dang masü saka Nagaland nung lennirtemi ozüng amertem yaritsü atema community policing nung temulung agütsüsü ayongzüker. Public aser ketdangsurtem tsüngda amalitep tajung ayuba ajanga asen loktiliba tajungba akümtsü aser tarutsü lanu putu atema Naga loktiliba akangshitsü ta DAYO-isa ashi.

Tanü Naga loktiliba nung tashiyim agi sen saruba aser drugs khuretem agi kangshir aser iba atema CSOs aser NGOs ajaki shilem agitsüla ta parnokisa ayongzüko.

DAYO-isa Dimapur aser temeket nung aliba Aortem dang DAYO Helpline +91 89748 51911 ajanga osang sangoktsütsü nenshia metetdaksüogo.

Dimapur ya lendong maliba aser tetsüba melii aliba tesem ka kümdaksütsü asoshi asenok ajak longjemer shilem agidi ta DAYO-isa mepishia metetdaksüogo.

DC & DEO Dimapur ajanga counting agents atema metetdaksü

Dimapur, Monupii/May 14 (TYO): 18th Lok Sabha, 2024 atema General Election agitsü atema Commission ajanga sangdongba nung shia aliba ama June 4, 2024 anepdang 8:00 ako nungi tenzüka Commission-i agizüka aliba counting hall tem nung vote azüngtsü aser Dimapur nunga office of the Deputy Commissioner and District Election Officer, Dimapur nung azüngtsü, ta Deputy Commissioner & District Election Officer, Dimapur, Dr. Tinojongshi Chang, NCS ajanga sangdong ka

nung ashi. Anungji District indang Contesting Candidates/ Political Party tir temi shia aliba office nem May 17, 2024 tashinung Form - 18 (Appointment of counting Agents) den colour noksa tejang ana-na agütsüsü metetdaksür, ta ashi.

Constituency shia Commission-i melaba tables yamai alitsü: 1-Dimapur-I A/C atema Tables 5, 2-Dimapur- II A/C atema Tables 9 aser 3-Dimapur-II A/C atema Tables trok alitsü, ta DC & DEO Dimapur ajangasa metetdaksü.



New Delhi, May 14, 2024 (Agencies): Prime Minister Narendra Modi ket nung Rs 3.02 crore shi rongsen lir saka pa indang gari, ki mesüra kimung kecha mali.

Iba ya Mongulbarnü Prime Minister Modi-i Varanasi Lok Sabha constituency nungi tokteptsü atema nomination papers agütsüba nung shia lir.

PM Modi indang Rs 3.02 crore rongsen nung bank account asem nung fixed deposits yua aliba dena lir. State Bank of India (SBI) nung Rs 2.86 crore, Gandhinagar nung bank account ka nung Rs 80,304 aser Varanasi nung bank

account ka nung Rs 52,920 yua lir ta pa indang election affidavit ajanga ashir.

PM Modi-isa National Savings Certificates (NSC) savings scheme nung Rs 9.12 lakh yua lir aser Rs 2.68 lakh alangba gold rings 4 lir ta affidavit nungsa shia lir.

2018-19 nung Modi indang taxable income Rs 11 lakh lias aser 2022-23 nung anasü agi teimba Rs 23.5 lakh kümogo ta nomination papers nungsa shia lir.

PM Modi indang affidavit nung educational qualification indang shia aliba nung pa 1978 küm Delhi University nungi

Bachelor of Arts züngtem aser 1983 küm Gujarat University nungi Master of Arts züngtemba shia lir.

Narendra Modi-i 2014 küm Varanasi Lok Sabha constituency nungi mezüng toktep aser tan agi kümstük tasembuba tokteptsü atema tenüng agütsüogo. Pai Uttar Pradesh Congress unit president Ajay Rai den tokteptsü.

Mongulbarnü PM Modi-i Varanasi nung aliba district collectorate office nung nomination papers agüja liasü. Iba mapang Union minister Amit Shah aser UP chief minister Yogi Adityanath na den NDA lennir aikati PM Modi meina aru.

"Varanasi Lok Sabha menden atema tanü nomination papers agütsüogo. Iba otsüsütsü aketba menden nung aliba nübertem tenzüksüba ya maongka ka lir. Nübertem temoatsü dena tesüiba kü 10 tsüngda mapa aika inyaktetogo. Tarutsü nung mapa tajungba aser tekaraba inyaka aotsü" ta PM Modi-i tanü X nung metetdaksü.

June 1 nü Lok Sabha election shilem tenetbuba nung Varanasi nunga polling asütsü.

Mokokchung nung ULB Election atema nüboyimba sentong tenzüko



Sangtemla Ward nungi ULB election-i aitsü sangdonger Sb. Alemtuba Imsong (tiyong) den shisatokden nung tongti shilem agirtem noksa nung angur. Mokokchung, 14th May, 2024.

Mokokchung, 14th May (TYO): Sb. Alemtuba Imsong-i tang aruya aliba ULB Election nung Sangtemla Ward, Mokokchung town nungi tokteptsü sangdongba sentong ka 14th May, 2024 nü osangbener senden ka Hotel Whispering Winds, Mokokchung nung ayonga akadang metetdaksüogo. Pa ya Longmisa nung Sangtemla ward nung alir Wb. Imsanen Imsong jabaso lir.

Nüburtemi ni adokdaksüra tongtibangsa lanurtem dak rangloker parnok jenjang ajungkettsü asoshi inyaksü tejangraba tulu yur ni election nung noktaker, ta pai metetdaksü.

Tanü alima ya kanga kara ainer aser iba denji asen libaliru aser

maparen lenla ajak nung tsüngkang medema aotsübaji tensai akanger aser tanü alima ainba den medemdanga lanurtemi shilem tajung agitsüji kanga nungdaka kümogo, anungji, lanur nem maongka agütsüsüla, ta pai ashi.

Sangtemla ward nung kibong 770 dak tali lir aser nütsüng yongsük ajak agi 2670 shi lir. Yangji lanur 1550 shi lir. Nursery nungi high school tashi azünger 1000 shi, higher secondary azünger - 70 shi, college nung degree balala azünger - 50 shi, master degree agir - 40 shi, Laishir - 5, lanur mapa mangur - 260 shi, Govt. sector nung lanur - 45 shi, private sector nung - 40 shi, lanur hajira oa alir - 30 shi lir. Sangtemla nung nütsüng yongsük asadanga

lanurtem noklang nung 58.18% shi, liso masür (non locals) 23.44% shi aser teintet kibong 18.36% shi lir. "Tanü ni ULB Election-i aiba nükjidongji item nübur telemsa balala asoshi lanur tashi nung mulungteter noktaker", ta pai ashi.

"Lanur ka dang asünung, tashimait aika alitsü akok saka kü tashimait dak merangloki nenok nungi temoatsü aginür. Ward nüburtem asoshi kü taküm ajak tenla-a tajungtiba nung shilem agitsü ni nangzüker", ta paisa mepishia ayongzüker. "Tamakoktsü mapabo ni menangzüker, saka nenok nungi shisatsü aser tangatetba tajung ajanga telungjem nung inyaksü tejangraba lir", ta paisa shisem.

(Maneni tapak 2 nung...)

Nagpur Govt. Law College nungi tesayurtemi Kohima Law College semdang



Nagpur Govt. Law College aser Kohima Law College nungi tesayurtem May 14, 2024 nü Kohima Law College nung kaketshirtem den sensaksema mapang tangokba noksa ka angur.

Dimapur, Monupii/May 14 (TYO): Nagpur Govt. Law College nungi professor pungo arua May 14, 2024 nü Kohima Law College nung azünger aser tesayurtem den sensaksema liasü.

Kaketshir dang onük balala nung legal education agütsü aser Kohima Law College nung tesayurtem nungi Naga

Customary Laws indang angazüktsü mechi Nagpur Govt. Law College nungi tesayurtem ya arua liasü.

Par pungoi tejangraba tulu nung onük balala lemsatop aser iba sülen kaketshirtem den sensaksema liasü.

Iba sentong nung Kohima Law College indang principal Soni Magh-i tarur pela

agizükba o jemi aser Asst. Professor, Kezhokhoto Savi ajanga melepzüng o jembia liasü.

Iba sentong ajanga college ana tsüngta tesendaktep yanglua tarutsü anogotem nung 'exchange studies' ama college ana tsüngta kaketshirtem melentsü, ta Savi-iashi.

Tuensang nung DPDB senden menogo



Dimapur, Monupii/May 14 (TYO): Tuensang District Planning & Development Board senden May ita atema Deputy Commissioner, Tuensang, A. Zibenthung Kithan, NCS lenisüba kübok May 14, 2024 nü DC indang Conference Hall nung mena liasü.

Iba senden nung Lok Sabha Election 2024 agiba mapang shilem tajung agiba atema department ajunga dang Deputy Commissioner ajanga pelaba lemsatop aser heads of offices tem dang pei lemzüka station nung alitsü ayongzüka

liasü. E.E PHED, Er. Kedolhuto Punyu-i Dimapur nung tawa tembangba Nagaland Olympic and Paralympic Games osang agütsü, kong Tuensang District ajanga medan 9 angu, aser iba asayamung nung shilem agir nem kulizüng kaketshirtem agüja liasü.

Heads of offices temi rongsen aser osettsüset agi yaritepba atema pelaba metetdaksü aser former Deputy Commissioner, Lithrongla Tongpi Rutsa dang alakteta pelaba lemsatopa liasü.

Iba senden nung DLRSO, Sangthing Khiam-i office aser

staff quarters atema ali patta meyangu alirtem dak tekeratiba nung yanglutsü ayongzü.

ADC Tuensang, Thungchanbemo Tungoe-i arua aliba municipal elections atema Government gari tejangja agütsü züngsemtem ayongzü.

Board ajanga Noksen Sub-Division nung SDAO Office lapoktsü atema sorkar dangi aben. Iba den külemi Nyinyem Village nung Mithun Farming Association aser SB-GEN welfare Society Yangpi village society registration atema sorkar dangi bena liasü.

Zunheboto DPDB meeting aser picnic sentong ayongzü

Dimapur, Monupii/May 14 (TYO): Ita shia amenba Zunheboto District Planning & Development Board senden aser board züngsemtem sentong ka Arkha's Farm nung May 14, 2024 nü DPDB Chairman aser Advisor, Land Resources, G. Ikuto Zhimomi lenisüba kübok agia liasü.

Deputy Commissioner & Vice Chairman DPDB, Zunheboto, Rahul Bhanudas Mali, IAS ajanga tarur pela agizüka senden tenzü aser tawa Lok Sabha Elections 2024 takok ngua agitetba atema pai HoDs aser züngsemtem nem tenüsang agüja liasü.

District nung Lok Sabha election tajungtiba nung agitetba asoshi Zunheboto district kübok legislature tenet tenüng nung

Board Chairman G. Ikuto Zhimomi-ia HoDs aser sorkar mapa inyakerem dang pelaba lemsatopa liasü.

Paisa state nung ano ULB elections agitsü aliba indanga lemsatop aser HoDs ajunga dang amalitep akatsü aser yariteptsü ayongzüka liasü.

Satakha Sub-division nung Sub-Post Office amenoktsü atema ADC Satakha, M.S. Thangpong ajanga onük benokba nung züngsem temi jemi aser approval atema tim department dangi yoktsü lemtet.

Senden nung mendenpubai June 5, 2024 nü amungtsü ailiba World Environment Day indang onük benoka HoDs ajak dang akokba lenmang nung yariteptsü ayongzüka iba senden tembang.

Assam Rifles temi Peren nung libajen atema lecturer agütsü

Dimapur, Monupii/May 14 (TYO): Assam Rifles temi Government Higher Secondary School, Peren nung kaketshirtem ajungmesoa 'Meri LiFE' campaign nung shilem ka ama lecturer sentong ka ayongzüka liasü.

Iba sentong nung kaketshirtem nem LiFE movement nükjiong angatetdakja liasü, koba nürburtem 'pro-planet people' kumdakja tzü-mopung memeneni/meraksai alitsü takum nung yimya balala amshitsü aser lanurtem ajungmesotsü asoshi lir.

Iba sentong nung school

nungi kaketshir 132 arua tejangraba tulu nung shilem agia liasü.

Iba mapang kaketshir nem libajen wazüka ayutsü, kumzüka ayutsü aser kumdanga aser anepalua amshitsü takum yimya angazükdakja liasü. Parnok dang pei tembar aser kinunger dang iba indang angatetdaksütsü ajungshi.

Kaketshirtemi anogoshi pei libaliru nung akok tashi melenshia libajen wazüka ayutsü aser pei medemer aser kinungertem den maneni yimya tajung amshitsü asoshi ajungshitsü züngzüktepa sentong tembang.

Mokokchung nung ULB... (TAPAK 1 NUNGI...)

Sb. Alemtuba dang iba osangbeneri "na koba ticket nungi tokteptsü?" ta asüngdangdang, "NDPP ticket bushidar, ni ya NDPP nung active member ka lir, anungji, ticket ji ni angutsü imlar", ta pai langzü. NDPP ticket rakteperji pa dang masü ano tangara ka lir ta angazüker.

"Na adokra nai kechi nungsa tongtibang agütsütsü?" ta metetnüa asüngdangdang, teinyaktsü aika lir saka item rongnung tongtibangsa lanurtem pei sempet metetdakja itemji renlokdaksüba 'skill development' tsütsü temulung agütsütsü, micro financing nung ya maongka jenti sentaka lir, anungji, iba nungjia temulung agütsütsü aser talisa Sangtemla ward ya commercial tesem ka asünung, aiben janaona tebilemstsüsa arur, anungji, janaona koda anepalutsü (waste management) item nung temulung agütsütsü, ta paisa

teinyaktsü kar lemsatop.

Arishi küm 34 tain Alemtuba Imsong ya Sangtemla Youth Association (SYA) tenteter rongnung ka aser mezüng vice president lir. Iba sülen SYA nung tir inyak, Longmisa Students' Union nung social service inyak aser tang-a sanen luden züngsem ka lir. MTBA A&B Youth Fellowship nung vice chairman, MTBA youth department nung Finance Secretary aser MTBA Youth Board nunga züngsem ka liasü.

Candidate tenüng sangdong den repsema ano 'Shisalen Tasen : Tarutsü Asüngsashitsür' ta sür tanü asenoki ajuruba tebilemstsü/teinyaktsü indang onük balala nung shisatokden sentong ka aka aser iba nung tongti shilem agirtemji - Imlimanen Jamir, Tshibenla Imsong, Imsuwapang Jamir aser Moasunep Pongener parnok liasü. Tejembirtemi teshisadangsü onük tajung aika bener arua lemsatop.

NAGALAND POLLUTION CONTROL BOARD						
Signal Point, Dimapur - 797112, Nagaland Tel.: 03862-245727, TeleFax: 03862-245726 Website: www.npcb.nagaland.gov.in e-mail: npcb2@yahoo.com						
AMBIENT AIR QUALITY FOR KOHIMA AND DIMAPUR CITY KOHIMA ASER DIMAPUR NUNG MOPUNG MERÜK-MEMERÜKBA JENJANG						
Sl. no	City	Location of air station	Type of area	Monitoring dates		Permissible limit As per the National Ambient Air Quality Standards "Iba tasazük alemabo metudaksütsü"
				07.05.2024	09.05.2024	
1	Dimapur	Bank Colony	Residential	103	107	100 µg/m ³
2		Dhobinala	Commercial	217	247	
3		NPCB Office, Signal Colony	Residential	142	140	
4		Tenyiphe, Chumoukedima	Commercial	119	77	
5		Nagarjan	Residential	70	47	
6		Viola colony	Residential	47	83	
7		Burma camp	Commercial	73	111	
8	Kohima	Opposite NST Office	Residential	29	33	100 µg/m ³
9		PWD Junction	Commercial	49	63	
10		High School Junction	Commercial	80	112	
11		Midland (Upper)	Residential	36	41	
12		Forest Colony	Residential	44	28	

Iba osang ya nübortem ajangzüksü atema Nagaland Pollution Control Board-i agütsür.



Deputy Commissioner, Zunheboto ajanga May 13, 2024 nü Ministry of Social Justice & Empowerment kübok ADIP Scheme ajanga Zunheboto district nung teyari oset balala lema agütsüba noksa nung angur.

Narendra Modi Varanasi nung nomination file süogo



Mongolbarnü Ato Kilonser Narendra Modi Varanasi nung nomination file asür aruba noksa nung angur. Pa meina Home Minister Amit Shah, BJP tir J P Nadda, UP CM Yogi aser NDA lenirtem oa liasü.

New Delhi, Monupii/May 14 (Agencies): Ato Kilonser Narendra Modi-i Lok Sabha elections atema Mongolbarnü Varanasi nungi pa indang nomination file süogo.

Video ka nung Uttar Pradesh chief minister Yogi Adityanath-i meiner PM Modi district magistrate office-i ia pa indang kuli kaket agütsüba nguogo.

Ato Kilonser Narendra Modi ya shitakbabo Gujarat nungi lir aser pa mezüngbuba 2014 küm Lok Sabha elections nung Varanasi nungi toktepa liasü. Pa tang agi tasembenbuba iba constituency nung tokteptsü, koba Hindu nung atema tongtibang tesem ka lir.

Nomination file masü tsüingda PM Modi-i, Ganga ayongküm nung

Dashashwamedh Ghat semdanga sarasadem. Paisa, Kaal Bhairav temple semdanga liasü.

Ato Kilonser-i Dashashwamedh Ghat nung aarti inyakyim benoka liasü.

Ghat nung sarasademba sülen PM Modi cruise ship ka nung Namu Ghat-i ao. Iba sülen pa iba nungtugu temple atong, kong putir temi vedic mantra tem zünga aliba mapang pa sarasadema liasü.

Iba temple yagi Modi meina Yogi Adityanath ao.

Iba tesem mesemdangtsüingda PM Modi-i, X ajanga pa Kashi (Varanasi tenüing tejenba) den tesendaktep tajung aliba indang lemsatepa liasü.

"Ni Kashi den tesendaktep

kanga tajung lir koba medemangtsü aser piladaktsütsü makok.. Iba ya tebang agi rasa ashitsü makok," ta pai ashi.

Hombarnü PM Modi-i iba yimti nung roadshow ka nung shilem agia liasü. Tanü pai iba sentong indang video ka lemsatep aser ashiba agi, Kashi nung alirtemi kü dang temeim sayuba den temaotsü agütsüogo.

Mongolbarnü Maharashtra CM Eknath Shinde densema BJP aser NDA-i yimsü süa aliba state tem nungi chief minister aser union minister tem PM Modi meina aotsü atema Varanasi tonga liasü.

Varanasi Lok Sabha elections atema vote ya June 1 nü agütsütsü.

Delhi nung mozüki 4 nung bomb pokdaktsütsü amokmeren

New Delhi, Monupii/May 14 (Agencies): Deepchand Bandhu Hospital, Dada Dev Hospital, Hedgewar Hospital aser Guru Teg Bahadur (GTB) Hospital ta Delhi nung Mozüki pezüi bomb pokdaktsütsü amokmerenba email Mongolbarnü agizükogo.

Anogo ana tejakdang kasa osang ya mozükitem, airport aser linük yimtiba nung Northern Railways' CPRO office dangi yoka liasü, ta ketdangsurtemi ashi. Ajisüaka tang tashi nung

temulung malemtsüsa kecha nguteta mali.

Delhi Fire Service ketdangsurtemi ashiba agi, parnoki mozüki pezü nungi bomb pokdaktsütsü amokmerena email agizükba indang osang angazüka liasü. Iba sülen bomb disposal squad, bomb detection team, fire department aser local police tem item tesemtemi oa bushisüingdang tenzüka liasü ta ketdangsurtemi ashi.

Mezüng north Delhi kübok

Ashok Vihar nung amenoka aliba Deep Chand Bandhu Hospital nungi 9:45 nung call aru. Tanabuba call ya southwest Delhi kübok Dabri nung amendaka aliba Dada Dev Hospital nungi 1:55 nung, tasembuba call east Delhi kübok Farsh Bazar nung aliba Hedgewar Hospital nungi 11:01 aser pezübuba call ya east Delhi nungsa Shahdara tesem nung amendaker aliba GTB Hospital nungi 11:12 ako nung arua liasü.

(Maneni tapak 8 nung...)



Indian Border Security Force (BSF) personal tem den lanurtem cycle rally ka nung shilem agiba noksa nung angur. Tzü wazüka ayutsü, education aser tzü mopung mereka ayutsü asoshi tangazükba agütsütsü nukjidong nung Iba rally ya West Bengal kübok Pariyal yimtsü nung ayongzüka agia liasü.

Delhi excise policy ken o nung ED-i AAP aitsütsü

New Delhi, Monupii/May 14 (Agencies): Enforcement Directorate-i Delhi high court dang parnoki Arvind Kejriwal-i aniba Aam Aadmi Party ya liquor policy ochi mashi ken o nung accused kümdaktsütsü.

Delhi excise policy ken o dak sendakba nung AAP lenir Manish Sisodia-i bail atema mepeshiba angadanga mapang central agency yagi okadak iba ken o benoka liasü.

ED-i, AAP ya supplementary charge sheet nung aibelena alir ka kümdaktsütsü ta ashi.

Kasa mapang nung Delhi liquor excise policy dak sendakba nung ED-i benokba supplementary charge sheet trokbuba asadanga sülen Delhi indang Rouse Avenue Court-i ken o May 20 nü ken o angadangtsü telemtetba agiogo.

Court-isa, BRS lenir K. Kavitha, judicial custody nung May 20 nü tashi ayutsü atsülangtsüogo.

Manish Sisodia, shiba Delhi sorkar kübok Delhi chief minister Arvind Kejriwal indang deputy liasü, pa taoba küm February ita nungi tetpuokdak yua lir. Pai bail atema mepeshiba okadak aikati magizük.

Liquor policy ken o nung

sübokrem agiba atema Enforcement Directorate-i Delhi chief minister Arvind Kejriwal densema AAP lenirtem aika aitsür lir.

ED-isa, ozüing alema bendenba sen ya shilem ka Aam Aadmi Party-i, Goa assembly elections nung nüboyimba sentong atema amshiogo, ta ashi.

March ita Aam Aadmi Party tekolakba Arvind Kejriwal ya Delhi excise policy senotsü ochi mashi ken o dak sendakba nung Enforcement Directorate-i pua liasü.

Iba ita tetenzüklen Supreme Court-i, Lok Sabha election temulungdang yur pa nem June 1 nü tashi interim bail agütsüogo. Ajisüaka SC-i, Delhi indang chief minister ama administrative mapa kecha minyaksü atema Kejriwal nem tetuyuba agütsüogo.

ED-i ken o ashishitsü atema jaokba tekuben tashi maoba atema Kejriwal apu, aser tashi mangaba atema pa aputsüsa aküm ta Delhi high court-i shia pa apuba pusemogo.

Arvind Kejriwal aser Manish Sisodia na dak alia AAP MP Sanjay Singh-a kasa ken o dak sendakba nung ita pongu tepuokdak yuogo aser pa dang bail nung lir.

Mumbai: Sign board chirepba lendong nung asür 14 jungogo



Mumbai kübok Ghatkopar nung sign board ka chirepba tesem nung tekümzükba maparen balala inyakba noksa nung angur. Iba lendong nung nisung 14 asü aser nisung 76 yirua liasü.

Mumbai, Monupii/May 14 (Agencies): Hombarnü Mumbai kübok Ghatkopar

tesem nung sign board ka chirepba lendong nung asür 14 jungogo aser nisung 75 yiruogo. Hombarnü yipru mopung tesashi aruba sülen iba lendong ya ataloka liasü.

Billboard kibur ya tetsür den tashiyim agi medemtsü merangba atema aija alir ka, aser taoba mapang ozüing alema sign board tem ajungketa ayuba atema 21 ben merenshiogo.

Ozüing alema ajungketa aliba 120x120 sign board kibur ya Ego Media Pvt Ltd director Bhavesh Bhide lir, aser pa taküm küm tetenzüklen Mulund police station nung IPC kübok Section 376 (punishment for rape) dak ajemdaker aija liasü, saka pa nem bail agütsü. Pa indang legal team-i ashiba agi,

pa anema benokba ken o ya teyazü.

Police-i ashiba agi, arishi küm 51 tain aser pa den sendaktepa alirtem anema IPC kübok section tapet dak ajemdaker Pant Nagar police station nung ken o ka benokogo.

Aija alirtem rongnung tongtiba anema tashishiba 21 tashi benoka lir, koba temelaba memeshi-i banner tem ajungketa ayuba dak sendaka lir. Item ya Mumbai Municipal Corporation Act sections 328 (putting hoarding without permission) aser 471 (fines) kübok lir. Pai pa anema benokba item tashishibatem aser cheque tem bounce asüba indang 2009 Maharashtra assembly elections mapang Mulund nungi toktepdang poll affidavit nung nangzükogo.

(Maneni tapak 8 nung...)



TIR YIMYIM YIMOBILEM (EDITORIAL)

DIMAPUR RASEMNÜ, MAY (MONUPII) 15, 2024

Kodaser Contractor mapa majung !


Phek district kübok Chozuba town lenmang blacktop asüba mapa kanga mejungi inyakba ngua MLA Kudecho Khamo-i Executive Engineer (R&B) Phek dang iba mapaji repringdang osang tejangja pa nem agütsütsü metetdaksüba jagi nübortem nem mulung anisüngzük ka agütsüogo. Atangji, MLA-ji constituency ajak repringtsü asoshi shimtetba nisung lir, anungji pai par constituency terenlok mapatem junga inyakba meinyakba repringba nungji pai par lima aser nübortem meima anepaluba jakla ka sayur. Aji oda, tedongzüng nung mapa inyakba repringtsü atema yutsürtem rongnung PWD (R&B) department nung Executive Engineer-ji kanga tongtibang ketdangser ka lir, anungji MLA-i Executive dangi mapa junga inyak meinyak repringdang osang tejangja yoktsü ashibaji kiburi kidang alir kilir tongtiba dang ki mapa indang asüngdang amai lir. Atangji, mapa inyakba repringtsü asoshi ayuba kilirtemji Executive Engineer dang masü saka ano pa mesüra la kübok SDO aser Junior Engineer ishikabo alitsü. Anungji, anüngdanga aser aonunga contractor-i mapa inyakdangji mapa nung oset shitak amshia mapa shitak inyaker asü meinyaker ta repringa inyakdaksütsüba jagi engineer-tem mapaji asütsü. Iba amaji contractor-temi mapa inyakdang repringa manidakra aser mapa renemer külena nübortem asoshi yanglutsüba lenmang aser kiojenji raksaa maotsüsa temulung agüja anepalua merepringra, ketdangsertemji mapa meinyak ita sen achiba dang masü saka iba dakji alia mapa shitak inyakdaksütsü merang masü saka meinyakdaksütsüang merangba amato temulung melemi bilemtsüsa adoker. Atangji, contractor dakjia pei lima meimba shisatsü lira, pai mesüra lai mapa mashika inyaker medokstetstü, tanü Nagaland nung item contractor-temji nüngdaker. Ajisüaka, Nagaland nung nübortem asoshi terenlok mapatem inyakbatem junga repringer mali yamaisa ao nungbo, ano mapa repringtsü ita sen agüja ayuba ketdangsertem repringtsü asoshia parnok madak kar alitsüsa akümer. Tanü Nagaland nung timtemji ibaji lir . Iba jagi Nagaland nung government lenmang aser kiojen mali küma omadagi. Item onüktemji government nung ketdangsertem mungdang nung süoki ia jembilasang arogotem nung asentenshi sentong ayongzüka akaba dang nungi tajungba süla. Chozuba nung tang lenmang meshitak yanglubaji lenmang nung blacktopping ao mao ka nung blacktopping ateta ayi meyiba noksa social media nung prokshiba ajanga bushisüngdang tenzüker. Ashi, mashi yangluyonga ayiji meyteta madok nungbo ketdangsertem jagibo odang yutsüla aser Chozuba nungjerji October ita nungbo lishi ajemashia senzüla. Tanü asüngbo ajaki ochishia alitsü merangerji sübokrem mesüra mapa nung contractor dang nungi yimsüsür aser ketdangser shingai commission magii alitsüsa akok, saka contractor mapa meshitak aser majung inyakba nung ashishinütsüka ser nung kecha mashishi bill renema agütsüra, yangjibo temulung malemtsüsa adoker. Joko, Nagaland-a tain akümer, anungji tang yabo yimsüsürtema, ketdangsertema aser nüborrtema dena pei ket agi mapa meshitak inyakba nungbo nümadanga alitsüba putu masü. Aji oda, iba putu yabo pei kolok chiraba aser metetba agi nübortem asoshi tajung inyaktsü merangtepba putu ashi, tangar asoshi mapa mashimashi inyaktsür asen - asen ajangzüksü merangba putu masü. Kasaji asen ki aser kima oktenba janaona pi kima yutsüba putua masü. Alima nung shiba südir sang, kopiga alitsü ? Tatsüka alidangji aseni inyakba mapabo ajak meshitak, ochimashi aser tangar akoksadaksüba mapatem dang asütsü asü (?) mesüra aseni inyakba mapabo kotak nungia dena ngua kotak tenyartema pelateptsüsa inyaktsü ? Aseni yangluba lenmang yangluzükli ayi meiba aser aseni yangluba ki yangluzükli raksaa aoba nungji jangratemtsü lir na ? Aseni nübortem asoshi inyakba mapa nung asen dang tajangzük agi ashi, nübortembo tajangzük mengura, tesüsabo MLA-i masü Kibubai asenok ajak dang asüngdangtsü ! Tanü ibaji melangzütet aika timtemdagi. Yangji tan asütsüla.

OLEMSABANG

LATE SUBONGNUKLU TAKÜM OTSÜ

~ Mrs. Meyisongla, Rtd. Deputy Director, Nursing Kohima

Asür Subongnuklu takum otsü, saka pa takum lia alidang züluba otsü tatsü agi zülur. Pa Shilutemba aser Pangjungjila na japaso tanabuba liasü. Par kinunger par 7 liasü. Tebur 5 aser tetsür ana. Par kinünger pa dang schoolibo ao. Pa 1900 kum aso südi. Pa yimdak class 1 tashi zünger Impur mission School nong tua azüng. Pa takar aser yimsüsür chir asünong shirit pongpang, marbo aser armlet sübor, tenarong nong metigango anor 18th Feb' 1918 kum Impur nong tua joined süa azüng. Pa lesson nong kanga tajung liasü. Yangji azüngdang pa tamang yimsü agizük. Iba atema pa kidang nongi aridok aser school azüngtsü teyari magutsü saka pai tamang yimsü medoktsü. Pa chiyongtsü maka kanga timtema shisa buluba agi kanga shirang. Tesayuri pa school peon mapa inyaktsü mapa agutsü aser ita nong senpak ana (Rs.2) agutsüba agi jang aser aonsotsü ali. Ano pa nem class 1 pur sayutsü chance agutsü. Iba atema Rs.5/- ita shia agutsü. Iba jagi school fee, chiyongtsü aser süoshi alia azüng. Pa tamang agi par tsürapur amang. Pa tanaben kidang arudaksü, pa class VI passed sür Jorhat Mission School nong class VII-X tashi azüng 1st Div. passed sür, Nagaland nong Agriculture Dept. nong inyaka, alidang DACCA nong Engineering College nong azüngtsü chance angu. Yangji zünger arua town overseer Dimapur nong inyak. Yang nong jagi D.C Kohima, Mokokchung aser Nagaland jaka aika nong inyaker SDO, PWD promotion angu. Idangjibo Technical azünger mali asüji, pai Road and Bridges, Water, Housing, Electricity department ajak nong incharge bena, mapa ajak koka bener ao.



Short Biography
of
SUBONGNUKLU OZÜKÜM

Kibong otsü

Pai tetsür asem agi, Longjangtsür ka la yakta süa adok. Mopungchuket tsür ka pai tanur 4, aser Changtongya tsür ka pai tanur 6 ajak agi tobur 4, tetsür 6, tanur 10 liasü.

Tambusang Dr. Imkongtoshi, Dr.Tiameren, Mr. Limatemjen Ex. Minister, Moanüngsang kentener. Tetsür 6 ji, Canada, Germany, Shillong, Bihar aser kar Mokokchung lir, pa tekolok tulu, shisa taka ajemalur, temeim aketba officer ka liasü. Pa Govt. mapa nong kanga meranga aser ochishia inyakba dak alaka pai nuburtem ajak ajungtsü mechi (Social) nuburtem atema mapa tajung aika inyak. Pa tamang nong kanga taking liasü.

Pa kum 87 asüandang par kidang süngjem süngjema pa arshi tempanger amozük ao. Pai inyaka toktsüba mapa tajungtem kar yangi shisemer.

No.1 : Ao student conference tenzüksüsang otsüren -

Ao student mungdang tenzüksü jembitipdang tenokdangba aika liasü. Ao mungdang standing committee yamai sangdong. Sher yimi Ao student mungdang akatsü melater mungdang nongi endoktsü. Ano shirisa iba mungdang jagi odir, arogo nongi endoktsü ta ozüng tesashi agutsü. Ao mungdangi belem Ao student mungdangi Ao lima tamangba aser yimden mapa ajak nong teraksa bener arutsütsü tsüba belem.

Mungdang standing committee meeting Changtongya yimsen nong amungdang 1925 kum Mr. Subongnuklu-i Ao student mungdang nükjidong ajak rasa ashi (Aims & Objects) committee membortemji : Rev. Sübongwati, Mr. Temendangba, Mr. Samar, Pastor Waikaba, Mr. Imnükenba aser Mr. Jongponglemba nur liasü parnoki yamai ashi nenok nükjidong tajung süra mungdangji liang, saka nenoki SDO (C) Mokokchung nongi temelaba agitsüla ta ashi. Ibai khuret kanga tulu liasü. Kechiyong Mokokchung SDO (C) den ajurua jembitsüji molusongzü jak nong pongliktsü ama tsüba liasü. Saka Tsungremi lemanng tajung ka lapoktsü.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Louisiana nung lanur karifle bener tekülem kidangi aittsü merang



Louisiana state kübok jila tilaka nung aliba St. Mary Magdalen Catholic Church telungi tekülem mapang tanur ka prangbong bener aitba sülen arogo putir atsüka aliba noksa nung angur.

Abbeville, Monupii/May 14 (Agencies): Louisiana nung lanur ka rifle bener tekülem ki tesülen aliba kishi ajanga aittsü merangba yong iba tekülem sentong nung dena alirtem kanga aoksatep.

Iba tatalokba indang video tangoka liasü, kechiaser sentong ya live-stream süa liasü. Arishi küm 16 tanur ka rifle bena aliba ya tekülem kidang alirtemi kanga kera ajitet aser lungbanger ali nung nenketa atar police tem jaoka pa apu.

Iba lendong ya Louisiana state kübok Abbeville nung aliba St. Mary Magdalen Catholic Church nung ataloka liasü. Deobarnep tekülem sentong nung adentsü asoshi iba tenlaki sünga tsürabor aser tanurtem sentepa liasü.

Iba sentong ya tenzüker minute 48 shi aodang atalokba video nung nguogo. Iba sülen tekülem kidang alirtem rongrongtepba sülen pei-peimenden nung tanaben amen

aser putir Father Nicholas Dupré shisabolua nokdaka liasü. Second ishika lir mejangjaba nisung ka putir dangi arua tenarong nung angoker langa ashi. Pai tekülem kidang alirtem dang pa den külemi sarasademtsü ashi saka tanur 60 First Communion agizüksü alirtem den külemi tekülem kidang alir kar ola tulu adoka asatepa liasü.

Langpang nung aliba tebur chanu temi putir dangi oa ola adoka nungzütepba indang ashi aser parnok atsükba video nung angu.

Iba video nung police ana arua tensa aziökba nguogo. Mejangjaba nisung kati loudspeaker nungi tsürabortem dang pei tanur anir tekülem kidang nungi ainshitsü ajungshia liasü."

"Onoki tebur chanu ka pua lir, pa police ket nung lir, süngjemang aser ner tanur anir tanemi oang," ta iba nisungba yagi loudspeaker nungi ashi.

Prangbong bena alisang ya arishi küm 16 tain sentsü temesüng tebur ka lir, aser ozüng amshirtemi pa den asüngdangya sür temang tendangtsü atema Abbeville General Hospital Behavioral Unit-i anir ogo, ta Abbeville Police Chief Mike Hardy ajanga Facebook nung ashi.

"Iba nisungba ya tekülem kidang alirtemi apu aser kimai anizük. Police tem tonga aruba sülen temulung melemi alisang apu aser custody nung yua lir. Abbeville Police Department aser Vermilion Parish Sheriff's Office nungi police tem tekülem kidangi kanga kera ao aser tensa aziök," ta Hardy-i ashi.

Tanubosang anema nüburtem tsübodaktsüba aser tanuri prangbong bena aliba ken o benoka lir, ta New York Post ajanga ashi.

Abbeville ya United States kübok Louisiana state nung jila tilaka lir, kong nisung 11,000 shi alir.

ANOGO ABEN TSÜNGREM DEN

Sarasademang, ataang mesüra mapa

- T.Ken 94:11-23

"Tamajung inyakeretm anema ni asoshi shibai noktaksü? Temenen inyaker anema ni asoshi shibai noktaksü?" (t.16). Iba tasüngdangba nung kechi koma telangzüba ka agütsütsü ni memetet.

Tebilemstütem asoshi asenoki sarasadem dang asütsü mapang ka lir. Asenoki ataa alitsüba mapang ka lir. Tsüngremi "tangbo masü- ni tesülen ibai repringtsü" ta ashitsüba mapang ka lir. Saka asenoki inyaksüba mapang ka lir. Mosa noktaka atar nüburtem Ejipt nungi adokdaktsüba, mesüra Dawidi Tsüngrem O bendangba mapa inyakdang ama.

Asenok alima tesangwa ama noktaker sangwadaktsütsüba mapang ka lir, asenok alima metsü ama alima raksaa aodang aji kümzüktsü amshitsü mapang ka lir.

Terepranger ka ama, "Junger, ni iba atema sarasademtsü" ta ashitsü koda temüla! Junger, yamaji inyakang. Saka Tsüngremi ashir, "Ni atema tamajung inyaker anema shiba noktaksü?" Telangzüba: Shirnoki Tsüngrem parnok Teyarir ta meteta lir parnoki noktaksü. "Kibubai ni meyarilasang Kü nela sür lilla" (t.17). "Saka Kibuba kü mitsa aser kü Tsüngrem, kü lung, shiba dak ni jenoker" (t.22). Kodang Tsüngrem ne teyarir lidir, kodang Tsüngrem O nung aruba Tsüngrem tashi na katir, nai iba lima temenen anema noktaktetsü.

Shirnok temenen nungi pilaa lir mapa inyaksü ajar. "Temenen chuba menden, kobai temenen ozüng kümdaktsür, ibaji ne den telungjem lidima?" (t.20). Tanü asenok temenen aika nungi kümzüktsü ozüng kar.

Aji saka shirnok temenen nungi pilaa lir, parnoki tamajungba anema Tsüngrem den noktaksüla- Pai tatem nung takok agütsütsü ta amangertem. Asenoki rara karbo makoktsüsa akok, saka Tsüngrem tenüng sangang asenoki raraji akoktsü!

Tamajung inyakeretm den Khristantemi pelaa malitsüla. Asenoki parnok den sarasadema, ataa aser mapa agi inyaksüla. Tsüngremi na Pa asoshi tawabangba ka südaktsüner. Pai na kong yutsür idakji taküm aliba kuli ka süa liang. Kodang nai sarasademer, ataa alir mesüra shilem agir, Pa leniba asüngdangang.

Indonesia nung Muslim nung kibong kati tekülem mapang timtem agütsü

Surabaya, Monupii/May 14 (Agencies): Indonesia nung Java asetkong kübok ketdangtsür ka aser par Muslim nung kibong kati taoba hopta tekülem sentong ka meinpronga liasü, kong tesüiba mapang kodanga yamaji matalokdang.

East Java Province indang Cerme Sub-Regency of Gresik Regency kübok Betiting yimtsüng nung Benowo indang citizen association (Ketua Rukun Warga mesüra RW) tekolakba den pa kinungtsü aser tanur Bodhbar (May 8) nikongdang 7:00 ako meta house church ka kima nokdaker yangji tamanger züngsem 30 aliba dang tekülem sentong anentsü ayimtena liasü.

Iba house church nung tamanger Gabriella-i ashiba agi, tebu, tetsü aser par jabaso ya asatena aru aser parnok dang o tamajung shia tekülem sentong

anentsü ashi. West Indonesia Protestant Church (Gereja Protestan di Indonesia Bagian Barat, or GPIB) kübok Cerme Indah Real Estate, Block P/36 RT 11 RW 03 nung tekülem sentong ya anen.

"Onok dang tekülem sentong anendang ta asatena parnok aru. Iba ola angashia kidang kiyongertem adenshi aser RT 11 tekolakba arua tensa süngjemdaktsütsü merang," ta Gabriella-i ashi.

Tekülem sentong ya ola tulu adoka agiba masü aser küm ter dak tema timtem kecha majurui tekülem agia aru, ta lai ashi.

Iba tatalokba indang video ka social media post nunga lemsatep aser video nung otsü ashisangi citizen association tekolakba ya Yayak Hari Subagio lir ta ashi.

"Video nungya kibong kati

Benowo nung GPIB züngsemtem tekülem sentong nung meinprongba angur. Iba kibong ya Yayak Hari Subagio aser pa kinungtsü Yayik Susilowati, Cerme 1 Public High School nung inyaker aser tena jabaso lir aser parnoki ayimten tenzüker. Temeket nung alirtemi parnok ola angashi aser tensa aziöktsü merang," ta otsü ashisangi ashi.

Iba house church nung züngsem 30 ya tekülem sentong agia alidang par kibong arua kima nungi tekülem sentong anentsü ayimtena liasü, ta ashi.

Cerme Police Chief Andik Asworo-ia Bodhbar nikongdang iba tatalokba indang shia liasü.

"Ibai arogo shibangtsüba indang masü senshidaktsüba indang lir. Police temi bushisüngdang südar aser

angattetpedaktsütsü meranger. Local RT nungi osang atar," ta Andik-i ashi.

Taoba mapang Association of Indonesia Islamic Students (Persatuan Mahasiswa Islam Indonesia, mesüra PMII) nung chairman inyaka alisang aser tang Lamongan Regency, East Java nung Ansor branch tekolakba Sirojul Munir-i ashiba agi, ketdangtsür kati tekülem sentong meinprongba ya kodanga mongudangba tatalokba ka lir, aser parnok ya iba tesem nungji alira masü.

"Iba mapa inyaker ya local community/RT züngsem masü anungji nüburtem kanga aoksatep," ta Sirojul-i osangbener dang ashi.

"Iba ama atalokba ya maksü tulu lir, iba tesem nung tesüiba küm ter tsüngta iba ama ataloka mali." Rarapangsenba aser iba ama tatalokbatem aziöktsüla, ta

pai ashi. "Inter-Religious Harmony Forum (Forum Komunikasi Umat Beragama, mesüra FKUB) ajanga maneni nisung balala den sensaksema tamangba yimsü akumtsüboteptsü ajungshitsüla, aser ibaji ajanga dang lokti nung kin balala tsüngta tesunep nung alitsü," ta Sirojul-i ashi.

Nisung million 231 aliba Indonesia ya alima nung Muslim nütsüng timtiba aliba linük ka lir, kong tesüiba küm 25 tsüngta Khristanpur tekülem agiba nung timtem agütsüba ataloka arur aser tesüsa May 5 nü Java asetkong nung kotari agi tamanger dak tsünga liasü.

Open Doors ajanga alima nung Khristanpur alitsü asoshi linük tamajungtiba 50 asadanga 2024 World Watch List nung Indonesia ya jenjang 42 buba nung lir.

AO OSHI ANGAZÜKDAK:
TANÜ ANGAZÜKTSÜBA OJANG



Süngrong

(n) kidang atep anasa tatsüksü süng ayuba tesem (a place where firewood are kept inside house)
* Akhi tsürabur kidangbo süngrong nung teti tatsüksü süng yua liasü.

Süngrong

(n) süngdonglidong agi sünga aliba tesem (a grove of wood)
* Süngrong nung meyiba süngdongtem melamelaa tulu makümer.

OLONG PAITEP # 6787

	1			2	3				
4			5						6
					7				
	8								
	9		10			11			
					12			13	
14									
					15				

TIPIEN

- 2. Sü jeplok - (4)
- 4. O agi merenshi - (5)
- 7. Ayongküm li - (5)
- 8. Chiyungsümapangsüiadok - (4)
- 9. Tsüngrem den jembiba - (9)
- 12. Saklok - (4)
- 14. Samaba mebushitet - (5)
- 15. Mejanga onü - (5)
- 16. Tzü shiruru ka - (4)

LANGTSÜNGLEN

- 1. ____ i - (4)
- 3. Kasa masü - (6)
- 5. Nüchi masü - (5)
- 6. Tashi endok - (5)
- 9. Langtem - (5)
- 10. Anü malidang - (6)
- 11. _____ kibur - (5)
- 13. Tebur tembar tsüngda jatepba - (4)

OLONG PAITEP # 6786 TELANGZÜBA

TIPIEN :

- 1. Semtu, 3. Lepko, 5. Bilem,
- 8. Ulu, 10. Tsüngpang,
- 11. Tesangwa, 13. Aoksa,
- 15. Putir, 16. Yipru.

LANGTSÜNGLEN :

- 1. Sayu, 2. Teb, 4. Kimong,
- 6. Lungkak, 7. Milak,
- 9. Zünga, 10. Temopu,
- 12. Walu, 14. Ali.

NAI-A YA METETTER MA



Qatar nung India nunger tanur kati world records aika ngutetogo. Arishi küm 4 tain Megna Musuwathee Manoj Yogi-i 'speed reading' atema otsü tassen aika yangluteta liasü. 2019 Covid wara mapang Megna'er tsüraburtemi la nem flashcards bendena agütsü aser idang nung jagi lai speed reading tenzüka liasü.

Megna arishi küm 2 asüduang lar tsüraburtemi Indian Book of Records (IBR) aser Worldwide Book of Records dangi la indang speed-reading skills video tem yoka liasü.

March 9, 2024 nü Indian Book of Records ajanga Megna nem "fastest child to read one hundred English words" naroküm agütsüogo. Iba mapang la küm 4, ita 9 aser anogo 21 tain liasü.

Anti-corruption police station nem ISO certification agütsü



Itanagar, May 14, 2024 (Agencies): India nung mezüngbuba ISO 9001:2015 certification anguba anti-corruption police station ji Arunachal Pradesh nung Special Investigation Cell (Vigilance) police station lir.

Iba certification ya Quality Management System tajung aliba atema agütsür aser SIC (Vigilance) police station-i

tashishitsü melii mapa inyaksangshiba, codified rules and procedures shitak benshiba aser maparen tajungba akümiba ajiteta agütsüogo.

Arunachal Director General of police (DGP), Anand Mohan-i officer-in-charge L Dawa nem certificate agütsü.

Nokmey Namati Hall nung SIC (Vigilance) police station indang 20 buba Foundation Day

sentong nung iba sempet agütsüogo.

Iba police station ya May 12, 2005 nü lapok aser SIC ajanga sorkar mapa inyakertem anema benokba ken o tem bushisüngdang. Prevention of Corruption Act kübok adenba ken o tem parnoki repranger.

SIC-i küm 20 tashi tenzüka aruba ateam tenüngsang agütsür ta DGP Mohan-i ashi.

"Nübertemi temulung lemtetba reju ka akümiba atema SIC nem tenüngsang agütsür. Asenoki technology tasentem benshitsüla, skills tajungba akümitsüla aser inyakyim takangba küma SIC tajungba kümdaktsütsüla" ta paisa ashi.

Deputy Secretary (Vigilance) Habung Lampung-ia ochimashi anema raraba nung public-i amalitepa yaritepba indang ashi.

Vigilance department aser SIC tsüngda yaritepa mapa takok ngua inyakba atema pelar ta Habung Lampung-isa ashi.

Iba sentong nung SIC, vigilance department, legislative assembly ketdangsurtem aden.

Myanmar aser Bangladesh refugee 200 tema Mizoram-i aruogo

Aizawl, May 14, 2024 (Agencies): Myanmar kübok Chin state aser Bangladesh kübok Chittagong Hill Tracts nungi refugee 200 tema Mizoram nung arua jenokogo ta ketdangsur kati ashi.

Taoba hopta Bangladesh nungi Mizo nunger kin Bawm nunger 127 tashi Lawngtlai district kübok Chamdur 'P' village nung arua jenok. Parnok züngsema Mizoram nung Bangladeshi refugees 1,386 kümogo ta ketdangsur ashi.

Bangladesh kübok Chittagong Hill Tracts nungi Kuki-Chin nunger 1,241 tashi Lawngtlai district nung jenoka lir.

November 2022 nungi Bangladeshi army-i Kuki-Chin National Army (KNA) anema mapa tenzüka sülen Mizoram-i refugee tem arutsü tenzüka liasü.

April 30 nungi May ita tetenzüklen tashi Myanmar kübok Chin state nungi refugee 85 tashi Lawngtlai aser Khawzawl district tem nung

arua jenoka lir ta ketdangsurisa metetdaksü.

Arakan Army telungpurtemi parnok anioktsü tsübuba agi Myanmar sensotem jena aru ta paisa ashi.

District administration temi refugee tem asoshi relief & humanitarian teyari agütsür.

May 4, 2024 tashi nung Mizoram nung Myanmar nunger 34,346 tashi jenoka lir aser parnok rongnung tanur 13,302 dena lir ta state home department-i metetdaksüogo.

Imphal nung civilian amaker nisung 7 apu

Imphal, May 14, 2024 (Agencies): Imphal nung market centre tongtipang ana-Paona Keithel aser Thangal Keithel nung civilian tem dak teka sangshirtem Manipur police-i puogo.

Iba ya Hombar aonung atalok aser social media nung video footage ka prokshiba sülen police-i bushisüngdang tenzüka liasü.

Iba mapang Manipur police-i nisung tenet apu aser parnok rongnung tanur pungu densema lir. Imphal West District aser Imphal East District kübok tesem balala nung parnok apu.

Parnok tanishirtemji Khumukcham Brainny Singh (19) aser RK Ronish Singh (22) na ta jangjaogo.

Tanurtem atema children in conflict with law (CCL) nung lateta aliba ama ken o benoka lir ta police-i metetdaksü.

DIMAPUR GOVERNMENT COLLEGE
ESTD. - 1966
NAAC Accredited 'B+'
(Affiliated to Nagaland University)

CBSE & OTHER STATE BOARDS

ADMISSION 2024
UG PROGRAMME (ARTS & COMMERCE)

COURSES OFFERED:

- 1. Bachelor of Arts (B.A.) Major
 - (i) Economics (v) Philosophy
 - (ii) Education (vi) Political Science
 - (iii) English (vii) Sociology
 - (iv) History (viii) Psychology
- 2. Bachelor of Commerce (B.Com.) Major

Eligibility: A candidate should have a minimum of 45% aggregate in HSSLC Exam

- Filling of Admission Form Online (Registration) : 16th May 2024 to 18th May 2024
- Entrance Test (Inperson in the College Campus) : 21st May 2024
- Time of Entrance Test
 - 1. Arts (Education/English/History/Philosophy/Political Science/Psychology/Sociology) : 09:30 am to 11:30 am
 - 2. Commerce & Economics : 12:00 pm to 02:00 pm
- Venue of Entrance Test : Dimapur Government College
- Declaration of 1st Selected List : 24th May 2024
- Admission for 1st Selected List after Physical verification of Original documents in the College : 25th & 27th May 2024
- Declaration of 2nd List (Depending on availability of seats) : 29th May 2024
- Admission for 2nd Selected List after Physical verification of Original documents in the College : 30th-31st May 2024
- Orientation for all 1st Semester students : 3rd June 2024 (10:00 am)
- For registration and further details about entrance test kindly refer prospectus in the college website

<http://www.dimapurgovtcollege.in>

***HELP DESK NUMBERS:**
Monday to Saturday during office hours-10:00 am -04:00 pm
* Admission Procedure & Entrance Test
1. Arts : 9863332524 | 9366127445 | 9366317208
2. Commerce : 9366443881
* Technical Support for Online Application : 9366493332

Kylian Mbappe nem France Player of The Year Award agütsüogo



Monupii/May 14, 2024 (Agencies): Hombarnü Paris nung naroküm agütsüba sentong ka nung Kylian Mbappe nem France indang player of the year naroküm agütsüogo.

Arishi küm 25 tain Mbappe-i, UNFP (French players' union) Trophies gala nung küm pongububa atonga Ligue 1 nung best player naroküm agizükogo. Pai 2023-24 season nung PSG atema tetoktepa balala nung goal 44 idakja laisü.

France captain yagi taoba hopta pa season tembanga pa indang contract tembanga sülen PSG toktsütsü ta shiogo aser pa Real Madrid nung adentsü imlar.

Mbappe, PSG tenüng nungi

Hombarnü tatembangsa asayaogo. Iba asaya nung parnoki Toulouse goal 3-1 agi makok saka paibo goal ka idakja laisü.

Iba goal idaktsüba densema pai Ligue 1 nung goal 27 idaktsü, koba Lille nungi Canada nunger striker Jonathan David dang nungi goal ti agi timba lir, shiba tanabuba jenjang nung lir.

Season ano metembangi lir aser Mbappe asayaba PSG team ano Ligue 1 asaya ana iba hopta asayatsü aser Lyon den May 25 nü French Cup final asayatsü lir.

Iba naroküm atema külem asayartemi vote agütsü aser Mbappe-i tanga nominee tem ajateta laisü. Iba naroküm ya taoba mapang 200m aser 400m

Olympic champion Marie-Jose Perec-i pa nem agüja laisü.

Nominee tem rongnung külem PSG teammate Ousmane Dembele, Brest nungi Pierre Lees-Melou, Marseille nungi Pierre-Emerick Aubameyang aser Lille nungi Edon Zhegrova nunger densema laisü.

Kasa mapang nung PSG nungisa midfielder Warren Zaire-Emery nem young player of the season naroküm aser Gianluigi Donnarumma nem best goalkeeper naroküm agüja laisü.

Brest coach Eric Roy nem coach of the year naroküm agüja laisü. Pa lenisüba nung par team puti otsü nung tang mezügbuba Europa League nung asayatsü atema maangka ngutetogo.

Bangladesh T20 World Cup team nung Shakib züngoksemogo

Monupii/May 14, 2024 (Agencies): Taruba ita West Indies aser United States na nung asayatsü aliba Twenty20 World Cup atema Bangladesh team nung all-rounder Shakib Al Hasan züngoksemogo.

Iba asayamung nung Bangladesh team batsman Najmul Hossain Shanto lenisüba nung asayatsü, shiba taküm format asemprongla atema captain asütsü shimogo. Shakib tenük nung timtem adokba ajanga asayatetsü masayatetsü mejangjai aliba mapang ka nung Shanto nem captain mapa agüja laisü.

Taoba Bangladesh team captain ya küm ka shi masayai lir iba ita Zimbabwe den asayaba T20 asayamung nung asayaogo. Iba asayamung nung pai asaya ana nung wicket pongu agia laisü.

Arishi küm 37 tain asayar ya January ita agiba election nung Awami League party nungi toktepa takok anguba sülen MP kümogo.

Pace bowler Tanzim Hasan Sakib, shiba Zimbabwe 4-1 agi akokba asayamung nung asaya ana atema shima laisü, pa-a shimogo aser Shoriful Islam-a team nung züngoksemogo.

World Cup nung Bangladesh team Group D nung Sri Lanka, South Africa, Netherlands aser Nepal den asayatsü. Parnok mezügbuba asaya Sri Lanka den Dallas nung June 7 nü asayatsü.

Bangladesh squad: Najmul Hossain Shanto (captain), Taskin Ahmed, Litton Das, Soumya Sarkar, Tanzid Hasan Tamim, Shakib Al Hasan, Tawhid Hridoy, Mahmudullah Riyad, Jaker Ali Anik, Tanvir Islam, Shak Mahedi Hasan, Rishad Hossain, Mustafizur Rahman, Shoriful Islam, Tanzim Hasan Sakib.

Women's T20I Rankings: Kaur & Richa na jenjang junga kümogo

Monupii/May 14, 2024 (Agencies): Mongolbarnü sayaba ICC Women's T20I Player Rankings nung India tetsür team captain Harmanpreet Kaur jenjang asem tejk dangi tua 13buba nung lir. Bangladesh den asayaba asayamung nung kanga junga shilem agiba sülen la tang jenjang junga kümogo.

India tsür rongnungisa Richa Ghosh jenjang ana tejk dangi tua tang 23buba nung lir. Bangladesh den asayaba mapang final asaya nung lai out mesüi kanga dang tongtibang run 28 ynglua laisü. Iba den bendenloksema Radha Yadav aser Titas Sadhu nata bowling rankings nung

tejk dangi tuogo. Yadav jenjang tenet tejk dangi tua 23buba aser Sadhu jenjang 18 tejk dangi tua 60buba nung lir.

Kasa mapang nung England aser Pakistan na asayamung sülen England tsürtem aika tejk dangi tuogo. Birmingham nung asayaba mapang captain Heather Knight-i run 49 yangluba sülen la jenjang pezü tejk dangi tua 18buba nung lir.

Amy Jones, shibai run 37 yangluba den catch pezü süa laisü, la-a batting rankings nung tang 26buba nung lir. Pakistan den asayaba mapang wicket pezü agiba sülen Sarah Glenn-a bowling rankings nung jenjang ana tejk dangi tua tang külem

teammate Sophie Ecclestone sülen pezübuba nung lir.

Maneni Lauren Bell-ia run 22 agütsür wicket 3 agiba sülen jenjang pezü tejk dangi tua tang tenetbuba nung lir. T20 World Cup Qualifier nung takok tajung ngutetba sülen Sri Lanka tetsür team nungi asayartem ajenjang junga kümogo.

Scotland den final asayaba mapang century ka yangluba sülen Chamari Athapaththu T20I batters' rankings nung tenetbuba aser all-rounders' rankings nung pongububa nung lir. Inoshi Fernando aser Udeshika Prabodhani nata tejk dangi tua bowling rankings nung 19 aser 30buba nung lir.

Manika Batra world No. 24 asayar kümogo

Monupii/May 14,2024 (Agencies): India tsürtem ronnungi nungtugu table tennis asayar Manika Batra tang mezügbuba world no 24 asayar kümogo, koba pa indang career nung tang tashi nung jenjang tajungtiba lir.

Saudi Smash nung kanga junga asayaba sülen la India tsürtem ronnungi world rankings nung top-25-i aiba mezügbuba asayar kümogo.

Arishi küm 28 tain Khel Ratna awardee, shiba iba asayamung metenzük tsüngda 39buba nung laisü, la jenjang 15 tejk dangi tua tang 24buba nung lir. Jeddah nung asayamung nung la quarterfinals tonga asaya laisü.

Manika, shibai 2018 Commonwealth Games nung kija aser team asaya nung gold

medal ngua liasü lai Saudi Smash asayamung nung Olympic gold medallist aser world championship aiben koker alila China tsür Wang Manyu (seeded second) dena koka liasü.

Iba asayamung nung India tsürtem ronnungi lai mezügbuba quarter final tongteta laisü.

Instagram post ka ajanga manika-i, ranking nung tejk dangi atuba ya mapang shitak nung atalokogo, kechiyong la Paris Olympics atema qualify asütsü asoshi meranga asayaba mapang ka lir, ta ashi.

Manika-isa la indang coach Aman Balgu aser Belarus tsür sparring partner Kirill Barabanov na danga la takok asoshi kanga pelaba lemsatepa laisü.

INDIA OSANG : Tapak 3 nungi...

Delhi nung mozüki 4 nung bomb...

"Police aser bomb disposal squad-i bushisüngdangar. Onoki anaben tashi mozükitem longa bushiogo. Tang tashi nung temulung malemtsüsa kecha nguteta mali," ta Hedgewar Hospital nung officer VK Sharma-i ashi.

Mozüki nung bomb tokja aliba indang mail ya doctor kati agizüka laisü, ta pai ashi.

Taoba ita ka tsüngdang tang agi pezübenbuba school tem densema tesem balala amokmerenba mail agizükogo.

Indira Gandhi International (IGI) Airport aser Delhi kübok sorkar mozüki trok shi-i bomb pokdaksütsü amokmerenba email agizükba sülen anogo ana lir Mongolbarnü iba ya atalokogo.

Delhi Police-i ashiba agi, mejangjaba account ka nungi May 12 nü IGI Airport amokmerena laisü. Email yoker

yagi airport telung nung bomb tokja aliba indang metetdaksü.

Kasa amokmerenji Burari Government Hospital, aser Mangolpuri indang Sanjay Gandhi Hospital-ia agizükogo. Delhi police-i bushisüngdang tenzükogo.

Amokmerenba osang agizükba mozükitem rongnung Dabri nung Dada Dev Hospital, Hari Nagar nung Deen Dayal Upadhyay (DDU) Hospital, Dilshad Garden nung Guru Teg Bahadur (GTB) Hospital, Malka Ganj nung Hindu Rao Hospital aser Rajpur Road nung Aruna Asaf Ali Govt Hospital densema lir.

Delhi-NCR kübok school 150 dak temai bomb pokdaksütsü amokmerena email yokba agizükba sülen hopta anashi lir tang ano mozükitem amokmerenogo.

Mumbai: Sign board chirepba lendong...

Bhinde tang jenshia senzüba mapang ka lir aser Mumbai police commissioner Vivek Phansalkar-i iba tatalokba dak sendaka alirtem nem tapet temerenshi agütsütsü ta tenangzüka agütsüogo. Brihanmumbai Municipal Corporation (BMC)-i ashiba agi, sign board chirepba tesem GRP ali nung tanungba billboard tem ajunga agintsütsü.

Civic body-i taoba mapang ashiba agi, iba sign board ajungketa ayuba atema M/s Ego Media Private Limited

nem tetuyuba ka agütsüogo. Ketdangsur tejen kati ashiba agi, N-ward assistant municipal commissioner-i advertisement agency ajak dang sign board tem tangsa tang agintsü atema tetuyuba agütsüogo, saka tang tashi kecha telangzüba agüja mali.

Chief minister Eknath Shinde shibai Hombarnü lendong atalokba tesem semdanga laisü, pai lendong nung asür kinungertem den nem sen lakh pongungu agütsütsü ta sangdongogo.

BILEMDANGANG

Tema tazütsü atema masü saka aria bilema teyari agüjang